



www.focubreil.ch / mi-friberg@kns.ch

Rapport annual 13avel onn da gestiun

Preziadas commembras
Prezias commembers
Prezias hosps

Intent

Tenor artechel 2 dils statuts ha l'Uniun Forum cultural Breil gl'intent da tgirar, promover e sustener la cultura en ils vischinadis vegls dalla vischnaunca da Breil. Las activitads cumpeglian las suandontas tematicas: intermediaziun da cultura, lungatg, historia locala, architectura, occurrenz, publicaziuns.

A caschun digl onn da gestiun gest vargau ein tut quellas tematicas stadas pachetadas en las festivitads FAUSTA piuniera / 150 onns turissem a Breil/Brigels – eine Hommage. En LA QUOTIDIANA dils 27 da december 2023 han ins saviu leger sut il tetel general **Quai è stà noss 2023** denter auter il suandont (jeu citeschel):

Fausta piuniera a Breil

Durant quater meins ei il vitg da Breil seregurdaus igl onn 2023 dalla Fausta Capaul che ha – cun siu restaurant ed albiert – iniziàu il turissem da stad a Breil avon 150 onns. Ina fiasta d'avertura e restauraziun dil curtgin Crest La Crusch, in'exposiziun da maletgs digl artist Charles Flach, in teater el liber sco punct culminont ed in luvratori d'ideas cun il focus sil futur. Quei ein stai ils craps da cantun dil program da giubileum pil 150avel onn dapi las empremas activitads turisticas a Breil. In grond publicum d'indigens e da hosps da vacanzas ein separticipai allas occurrenz dalla Fausta piuniera, oravontut el teater el liber denter ils 4 ed ils 16 d'uost 2023. (Fin dil citat).

Pil Forum cultural han quellas festivitads muntau il pensum impurtont digl onn. Ils suprastonts, sco era commembers e commembras dil forum ein stai engaschai el comité d'organisaziun, vid la restauraziun dil Crest La Crusch e sco voluntarias e voluntaris a caschun dallas differentas festivitads.

Curtgin Crest La Crusch

En connex cun il giubileum da 150 onns turissem da stad, ha la vischnaunca decidiu da restaurar il Curtgin Crest La Crusch. Cun quella caschun ha il Forum cultural decidiu dad ademplier in giavisch daditg exprimius, numnadamein da tschentar en curtgin ina tabla panoramica cun las indicaziuns dalla cuntrada ch'ei veseivla da quei punct anora.

Geologie und Landschaftsgeschichte der Surselva

Il Forum cultural Breil e "Schichtwechsel – La Surselva" han envidau ils 9 da fevrer 2023 ad ina sera da referat cul tetel "Geologia e historia dalla cuntrada dalla Surselva". In numerus ed interessau auditori ha tedlau las explicaziuns dil referent Adrian Pfiffner.

Il geolog Adrian Pfiffner ha visitau la scola primara a Domat ed il gimnasi a Cuera. Il studi da geologia ha el terminau alla Scola federala politecnica a Turitg igl onn 1972. El ei staus engaschus sco professer per geologia en pliras universitads. In da ses temas specials ein las boas da Tumein e Flèm stadas.

La Surselva ei reha da crappa. Granit fetg dir sebratta cun crappa da sediments pli loma. La pli veglia specia da crappa ha 500 milliuns onns, la pli giuvna 300 milliuns onns. La gruppaziun dils differents tips da crappa ei sedada entras la formaziun dallas alps.

Il referent ha capiu a moda oreifra dad entusiasmar il publicum per la geologia dallas alps, en special dalla Surselva. La sera ei vegnida terminada cun in apero, duron il qual igl ei vegniu discutau vivamein dalla Surselva e sia crappa speciala.

La gasettina FORUM

Uonn ei la 3. Annada dalla gasettina FORUM cumparida. Ella ei sefatschentada mo cun ina tematica; co savess ei esser auter secapescha dalla Fausta piuniera e sias festivitads. Ella ei era cumparida mo inaga, denton ha ei dau ina ediziun da 36 paginas enstagl duas ediziuns da 12 paginas.

Archiv cultural

Per saver arcunar e registrar las biaras actas ch'il Forum cultural ha rimnau ils davos onns, ha la vischnaunca mess a disposiziun ed endrizzau ina stanza en casa communal che duei survir per quei intent. La lavur per propi vid igl archiv cultural vegn entschatta uonn, pia igl onn 2024.

Sper las activitads numnadas ei l'uniun era stada responsabla il 2023 per differentas activitads che serepetan mintg'onni puspei ed han da far cun las tematicas numnadas all'entschatta da quei rapport. Menziun speciala en quei connex less far dalla cruscha nova che ha renplazzau la veglia ch'era ida en decadenza enta Sum Naul.

Rendaquen

Entradas	9'041.00
Expensas	13'524.34
Sperdita	4'483.34
Facultad per 31.12.2023	16'221.01

Quei ei stau ina cuorta resumaziun dallas activitads dall'uniun igl onn 2023.

Per finir

Tut quellas activitads fussen buca pussevlas senza il generus sustegn da commembras e commembers. Actualmein dumbra l'uniun ferm tschien commembers. Bien duas tiarzas da quels habiteschan en vischnaunca. Tier strusch ina tiarza dils commembers setracta ei oravontut da convischinas e convischins ch'ei secasai egl jester. Lu essan nus era engrazieivels a tut las fatschentas ed als hosps da vacanzas che sustegnan l'uniun. In cordial engraziament per tut agid e sustegn. En quei engraziament less era enserrar tuts donaturs e sponsurs.

Medemamein less engraziar alla suprastanza communal pil beinvegniu sustegn finanziel – ed oravontut pigl endrizzament dil local pigl archiv cultural. A mes preziai collegas da suprastanza less admetter in grond engraziament pigl engaschi e tutta lavur.

Mo in summa

... meretan tut quellas e quels che lavura x-zanua persuls ni en uniuns per la cultura nies respect e nies engraziament.

Pertgei ei dependa da nus tgei che nus fagein cun nossa cultura e co nus tgirein cheutras nossa identitad.

Breil, ils 31 da schaner 2024 / Michael Friberg